

lewa.leselinyana

LESELINYANA LA LEKHOTLA LA TAOLO EA MOTLAKASE LE METSI LESOTHO



RERA e tšohla
litaba tsa
khaello ea
phehlo ea
motlakase
sebokeng
sa selemo 6



Dr. Thamae
ke Molula-setulo
oa Boto ea LEWA
e mocha 12

Malebela holim'a
tšebeliso ea metsi 4



9 • Lekhotla le labalabela phano ea litšebeletso

Babali ba *khobane*,

Re se re ile ra supa maselinyaneng a fetileng hore Lekhotla la Taolo ea Motlakase le Metsi (LEWA), lethahasella ho tsebisa ba nang le seabo litaba tsa lona ka ho phatlalatsa leselinyana lena khafetsa. Sena se ipapisitse le litebello le sepheo sa Lekhotla.

Khatisona ena, re kenyelelitse litaba tse akaretsang lintlha tse ngata tse fapaneng. Boto ea Lekhotla e se e na le Molula-Setulo e mocha, 'me leselinyana lena le phuthetse tse ling tsa liphetho tse etsahetseng tabeng eo. Dr Leboli Z. Thamae ke Molula-Setulo e mocha oa Boto. Boto e boetse e ile ea fumana setho se secha ha Monghali Thabo Khasipe e ba setho sa eona se seng.

Re boetse re shebane le lintlha tseo LEWA e buisaneng ka tsona le ba nang le seabo ha Lekhotla le ne le tsoere liphutheho le likopano le sechaba literekeng tse kantle ho Maseru likhoeling tsa ho qetela selemong sa 2014. Ruri ba nang le seabo ba na le maikutlo a fapaneng mabapi le hore na litaba tsa phano ea litšebeliso li ka atameloa joang taolong ea Lefapha la Phepelo ea Motlakase

(ESI) le ea Litšebeliso tsa Metsi le Likhoerekhoere Metseng e Literopong (UWSS). Maikutlo ana a hlahlojoa le ho sebetsoa ka hloko maemong 'ohle a lokelehang.

E le ho pharalatsa tsebo ho sechaba ka mesebetsi e fapaneng, litsi

tse nang le seabo litšebeliso tsa motlakase, metsi le likhoerekhoere, leselinyana le akaretsa ka bokhutšoanyane tlhalohanyo tsa tšebetso lipakeng tsa LEWA le litsi tse laoloang ke eona tse joaloka K'hamphani ea Lesotho ea Motlakase (LEC) le K'hamphani ea Metsi le Likhoerekhoere (WASCO). Ho fihlile tlhokomelong ea LEWA hore bohlokoa ba taba ena bo ka se tloisoe mahlo holimo.

O mong oa mesebetsi ea mantlha ea Lekhotla ke ho laola litefello tsa litšebeliso tsa motlakase naha ka bophara, metsi le likhoerekhoere metseng e literopong. Har'a tse ling, molao o bontša hore, ha ho etsoa mesebetsi oa ho nonya maikutlo a sechaba, ho lokeloa ho etsoa joang. Ke ka hoo leselinyaneng lena ho kenyelelitsoeng litaba tse hlokomelisang babali ka methati e lateloang tšebetsong eo.

Tse ling tsa lietsahala tsa tikolohong ea Afrika e Boroa tse mabapi le taba tsa motlakase le tsona li kenyelelitsoe kahar'a leselinyana. Lekhotla le ile la kopanya matsoho le ba bang ba nang le seabo taolong ea motlakase le phano ea litšebeliso ha le ba teng 'mokeng oa 'Mamekhatlo ea Litsi tsa Taolo ea Motlakase Tikolohong e ka Boroa ho Afrika (RERA) le Phuthehong e Akaretsang ea Selemo le Selemo (AGM) ea leshome le motso o mong oa oona 'Mamekhatlo, Zimbabwe ka Tšitoe.

Bophelong ba mehleng ena, litaba tsa phumantšo le poloko ea metsi li bohlokoa. Joaloka molaoli oa litšebeliso tsa metsi le likhoerekhoere, LEWA e se e nkile boikarabelo ba ho tlatsetsa mesebetsing ea ba nang le seabo ka ho ruta sechaba ka tšebeliso e nepahetseng ea metsi.

Litabeng tsa boithabiso le tse amanang le tsona re boetse re lekotse boikitlaetso ba Lekhotla litabeng tsa ntlafatso ea basebetsi le tsa mohl'a mokete oa phomolo ea matsatsi a Keresemese le Selemo se Secha tseo e leng tloaelo litsing tse ngata tsa tšebetso mafelong a selemo

Ntoi Rapapa

Mookameli

Comments Email: secretary@lewa.org.ls

Malebela mabapi le tšebeliso e ntle ea metsi

Tšebeliso e nepahetseng ea metsi e ka hlaloso e le tsela e hlokolosi ea ho sebelisa metsi ka mekhoha e bolokang metsi ea morao-rao.

O mong oa mesebetsi ea Lekhotla la Taolo ea Motlakase le Metsi (Lekhotla) ke ho etsa bonnete ba hore ho na le litšebeliso tsa metsi tse bolokehileng, tse fumanehang ka linako tsohle ebile li le litefiso li nepahetseng kahar'a naha. Ho latela moralo oa tšebetso o hlalositsoeng kaholimo, Lekhotla le etsa boikitlaetso ba ho ruta sechaba ka tšebeliso e ntle ea metsi.

Tšebeliso e nepahetseng ea metsi e ka hlaloso e le tsela e hlokolosi ea ho sebelisa metsi ka mekhoha e bolokang metsi ea morao-rao le ho kenya tšebetsong litloaelo tse lekanang kapa tse kaholimo ho tsa mehla tse ka thusang hore ho sebelisoa metsi a fokolang kapa ho a bolokela ho etsa mesebetsi o mong o itseng.

Basebelisi ba metsi ba khothaletsoa ke hona ho fetola mekhoha ea bona ea tšebeliso ea metsi ka ho fokotsa tšenyoe ea metsi le ho sebelisa lisebelisoa tse bolokang metsi. Tšebeliso e ntle ea metsi, kantle le kahar'a malapa e tla thusa hore metsi a lule a le teng kajeno le nakong e tlang. Polokeho ea metsi, hara tse ling, e ka fihlelloa ka ho etsa tse latelang:

Kamoreng e hlapelang:

- Koala pompo ha u nts'u hlatsoa meno. Pompo e buletsoeng e ka senya metsi a fetang lilithara tse tšeletseng ka motsotso;
- Kenya lihlooa tsa lishaoara tse bolokang metsi ka kamoreng e hlapelang;

- Hlapa ka shaoara ho e-na le ho hlapela ka bateng;
- Ha u hlapela shaoareng, bula pompo ha u itšela ka metsi 'meleng, u e koale ha u itšerama ka sesepa, ebe u e bula hape ha u ipolisa;
- Se ke ua sebelisa ntloana joaloka sekoti sa lithole. Qoba ho ntša likhoerekhoere le ha ho sa hlokahale; 'me
- Haeba matsohana a ntšang metsi a likhoerekhoere a robehile, a etsa hore metsi a lule a e-tsoa nako tsohle, a lokise kapa u reke a mang.

Ka ntlong ea ho phehela (kicheneng):

- Ho molemo ho noa metsi a tsoang ka sehatsetsing ho e-na le ho bulela pompo ho fihlela e ntša metsi a pholileng;
- Inela lipitsa le lipane tse litšila haholo ka metsing ho e-na le ho lula u buletse pompo ha u li hlatsoa;
- Sebelisa mochini o hlatsoang liaparo kapa lijana ha feela o tletse. U lokela ho reka mofuta oa mochini o bolokang metsi haeba u reka mochini o mocha;
- Ha u hlatsoa lijana ka matsoho, se ke ua tlohela pompo e butsoe ha u li polisa;
- Hlatsoetsa meroho le litholoana kahar'a sekotlolo, e seng katlas'a pompo e buletsoeng e be metsi a ntse a lahleha; 'me
- Se ke ua qhibilihisa nama kapa lijo tse ling tse nang le leqhoa la sehatsetsi ka metsi apompo e buletsoeng. Ntša lijo ka sehatsetsing bosiu bohle hore li tsoe leqhoa kapa u sebelise sefuthumatsi.



Naha ea Lesotho e se e tobana le mathata a tlhokahalo ea metsi. Ke maemo ana a tlamang hore batho ba sebelise metsi ka hlokolosi ele hore a baballoe.

Ka Jareteng:

- Sebelisa metsi a litšila ho tšella lijalo;
- Sebelisa bolekaana bo tšellang kapa lethompo le sa ntšeng metsi haholo;
- Qoba ho tšella ha ho chesa kapa ha ho le moea. Ho tšella hoseng kapa mantsiboea ho etsa hore mobu o boloke mongobo; hape
- Sebelisa lefielo eseng lethompo ha u fiela tseleng ea likoloi le ea maoto.

Ka kakaretso:

- Lokisa lipompo tse lulang li lutla metsi. Pompo e lutlang e senya likete-kete tsa lilithara tsa metsi ka selemo;

- Kenya pompo e etsang hore metsi a chesang a tsoe kapele, e le ho boloka motlakase;
- Ruta bana hore ba tiise lipompo ha ba li koala hang kamor'a tšebeliso;
- Sebelisa nkho le seponche ha u hlatsoa koloi, eseng lethompo; hape
- Reka tanka ea metsi ho khakeletsa metsi a pula.

Tšebeliso ea metsi a fokolang ho etsa mabaka a 'maloa e bolela hore ho tla ba le metsi a mangata matamong, linokeng le melatsoaneng a ka sebelisoang molemong oa boithapollo, limela le liphoofole tsa naha. Tšebeliso e nepahetseng e thusa hore phepelo e lule e le teng maemong 'ohle, ho sireletsa bophelo ba batho le tikoloho. Sebelisa metsi hantle! □

Thupelo ea ntlafatso ea basebetsi ba Lekhotla

Basebetsi ba Lekhotla la Taolo ea Motlakase le Metsi (Lekhotla) ba ile ba tsoareloa thupelo ea matsatsi a mabeli ea ntlafatso ea bonngoe ba basebetsi ho tloha ka la 30-31 Mphalane 2014, Tribute Guest House, Maseru.

Lekhotla le ile la tsoara thupelo ea ntlafatso ea bonngoe e le ho khothaletsa mokhoa o motle oa nelehetsano ea litaba, esita le ho khothaletsa tšebelisoano 'moho le moea oa bonngoe kahar'a basebetsi ba lona. Ka ho khetholoha lenaneo le reretsoe ho ntlafatsa likamano tse ntle ka hare ho basebetsi, phetsetsano ea litsebo le ho nena nyefolano le khethollano mosebetsing.

Ho thakhola lenaneo lena, thupelo ea Koetliso ea Bookameli e ile ea tsoaroa ka Loetse 2014 bakeng sa Botsamaisi ba Lekhotla. Thupelo e akaretsang ea ntlafatso ea bonngoe ea basebetsi e ne e tsoeroe ho tloha ka la 30 – 31 Mphalane 2014. Thupelo ea bobeli e ile ea kopanya basebetsi hammoho hore ba buisane ka litaba tse sa amaneng le mosebetsi oa bona.

Thupelo e ile ea buloa ka molao ke Mookameli oa LEWA Assoc. Prof. Ntoi Rapapa ea ileng a akaretsa ha khutšoanyane sepheo sa thupelo. “Likhato tsa ntlafatso ea bonngoe ba basebetsi li tsoaroa e le ho thusa basebetsi bohle e le hore ba tle ba fihlelle hammoho

Lekhotla le ile la tsoara thupelo ea ntlafatso ea bonngoe le ho khothaletsa mokhoa o motle oa nelehetsano ea litaba, esita le ho khothaletsa tšebelisoano 'moho le moea oa bonngoe kahar'a basebetsi ba lona.

litebello tsa Lekhotla. Ho feta moo, li reretsoe ho ntlafatsa kholo ea motho ka mong le kholo boemong ba lelapa la hae”, a rialo Assoc. Prof. Rapapa.

Thupelo e ile ea qala ka mokhoa oa hore basebetsi ba bue ka bolokolohi ka limelo le lithahasello tsa bona ka bomong tseo basebetsi ba bang ba neng ba sa li tsebe. Sepheo e ne e le ho phatlalatsa limelo tsa basebetsi le lithahasello e le hore ho fokotsoe tse mpe tse sa hlokeheng. Lebaka la mantlha e ne e le ho batalatsa mabala a tlhokeho ea puisano kahare ho basebetsi, ho felisa tsitsipano ea likamano tsa basebetsi le ho se utloisisane ho ka bang teng kahare ho bona. Basebetsi ba ile ba buisana ba lokolohile 'me ba ba ba fuoa monyetla oa ho ntša maikutlo a bona ba phutholohile e le ho aha tšepano lipakeng tsa bona empa motho ka mong a ntse a bolokile boleng ba hae.

Har'a tse ling, thupelo e ile ea shebana hape le litaba tsa tlhabollo moeeng le kelellong, tšebelisoano 'moho le boipabolo phanong ea litšebeliso. Mona sepheo e ne e le hore basebetsi ba ntlafatse boikutlo ba bona mabapi le mokhoa oa boinahano, taolo ea maikutlo le ea moea

oa bona ka bomong. Basebetsi ba ile ba bolelloa hore ho fihlella tsena, motho o lokela ho hlopha litaba tsa hae ka tekano lintlheng tse amang 'mele, pelo le moea.

Har'a lipolelo tsa tlhabollo ea maikutlo tseo ho ileng ha buisanoa ka tsona lithupelong tsena, lintlha tse latelang li ne li le ka sehloohong : “Maele a Machaena a reng ho molemo ho khantša kerese ho e-na le ho nyefola lefifi”, le a reng, “Lengau ha le ke be le nahane ho ja litlama-tlama leha le sa tsoase nyamatsane. Le tsoela pele ho tsoma ka mamello hofihlela le fumana nyamatsane ea lona”.

Bohlokoa ba lipolelo tsena, e ne e le ho bontša hore tiisetso le boikitlaetso ke litšiea tsa mantlha bakeng sa katleho kamor'a nako e itseng.

Qetellong ea thupelo, basebetsi ba ileng ba fana ka

mantsoe a teboho ba ne ba le lentsoe leng hore thupelo ena ebile e atlehileng ka hore e chorisitse likelello tsa basebetsi mabapi le taba ea ntlafatso ea bonngoe ba bona.

“Re kholisehile hore mefuta ena ea lithupelo e'a hloka hla le kamoso e le ho re thusa hore re sebetse hammoho. Hape li bohlokoa hobane li thophothetsa leano la tlhomphano le mamellano basebetsing maemong a bona ka ho fapana,” ho boletse Mofumahatsana Palesa Tsapane, e mong oa basebetsi ba LEWA ea ileng a hlalisa maikutlo a hae holim'a thupelo.

Mokhahlelo oa bobeli oa lithupelo tsa ntlafatso ea bonngoe o reretsoe ho ba ka 2015. Sepheo ke ho tsoellisa pele mehato e tla ntlafatsa le ho khothaletsa moea oa tšebelisoano 'moho har'a basebetsi □



Ba bang ba basebetsi ba Lekhotla la Taolo ea Motlakase le Metsi nakong eo ba kenetseng thupelo ea ntlafatso ea bonngoe.

Leselinyana lena le hatisoa hang kamor'a likhoeli tse tharo. Litaba tsohle tse ka har'a lona li ikarabella ho Lekhotla la Taolo ea Motlakase le Metsi Lesotho.

© 2014 Lekhotla la Lesotho Motlakase le Metsi. Mang kapa mang ea ka khahloang ke ho sebelisa litaba tse

Borali le khatiso: The Age Multimedia Publishers

LEWA e fumaneha : Lesotho Electricity and Water Authority,
7 Floor, Moposo House, Kingsway, Maseru, Lesotho
Tel: +266 22 312479 • Fax: +266 22 315094
Email: secretary@lewa.org.ls • Website: www.lea.org.ls
Postal Address: Private Bag A135, Maseru 100 – Lesotho, Southern Africa.

RERA e tšohla litaba tsa motlakase sebokeng sa selemo...

...mabapi le ho thefuleha le khaello ea phehlo ea motlakase,

Mamekhatlo ea Litsi tsa Taolo ea Motlakase Tikolohong e ka Boroa ho Afrika (RERA) e ile ea tšoara 'moka oa matsatsi a mabeli oa bo- 11 le Phutheho e Akaretsang ea Selemo le Selemo (AGM) Elephant Hills Resort, Victoria Falls, Zimbabwe ho tloha ka la 8-12 Tšitoe 2014.

'Moko-tabo oa 'Moka e ne e le "Matlafatso ea Tšebeliso ea Matla ka Mokhoa oa Boikopanyo Tikolohong ea Mokhatlo oa Ntšetso-pele ea Moruo oa Linaha tsa Afrika e Boroa (SADC)."

Lintlha tse ileng tsa tšohloa 'Mokeng li kenyeletsa ho batalatsa mabala molemong oa ho hohela batseteli lefapheng la Matla tikolohong ea SADC, ho lekola lietsahala tsa morao tsa theko le thekisetano ea motlakase tikolohong, litšebeliso tse fuoang basebelisi ba motlakase le ho matlafatsa litsebo le boiphihlelo kahar'a litho tsa RERA. Phuthehong e Akaretsang ea Selemo le Selemo ho seka-sekiloe khatelopele e seng e

fihletsoe tabeng ea ho phatlalatsa Moralo oa Tšebetso oa RERA oa 2013-2017.

Ha a bula 'Moka ka molao, Mongoli e Moholo Lekaleng la Ntšetsopele ea Matla la Zimbabwe, Monghali Patson Mbiriri o bontšitse hore ho bohlokoa hore litho tsa RERA le ba bang ba nang le seabo ba hlahise meralo ea 'nete e ka phethahalang e le ho netefatsa hore tikoloho ea SADC ha e ea salla morao ntlheng ea ho fana ka litšebeliso tse litjeo li tlaase, tse bileng li fumanehang habobebe ho basebelisi ba motlakase.

Molula-setulo oa RERA, Mofumahatsana Phindile Baleni oa Lekhotla la Taolo ea Motlakase la Afrika Boroa (NERSA) o tobokelitse hore 'Moka o bokantse batho ba nang le seabo Lefapheng la Matla ho tsoa tikolohong ea SADC ka ho fapana ho tla tšohla mathata a phepelo ea Motlakase e ntseng e qepha. O boetse a bontša hore bothata bona bo ntse bo etsahala leha e le hore tse ling tsa linaha tseo eleng litho tsa RERA li ne li e-na le mehloli e 'maloa ea phehlo ea motlakase joalokaha ho pakahalitsoe ke bongata ba lihloiloeng tse kang khase ea tlholeho, peterole le matla a inchafatsang (renewable energy) a kang a moea le letsatsi linaheng tsa SADC.



Tse ling tsa Litho tsa Boto ea Lekhotla nakong ea 'moka oa RERA, Victoria Falls Zimbabwe. Ho tloha ka letsohong le letsehali ke Dr. Leboli Thamae (Molula-Setulo) Mof. 'Maboiketlo Maliehe, Dr. Mampiti Matete le Mookameli oa Lekhotla Assoc. Prof. Ntoi Rapapa

6 "Ke kahoo ho leng bohlokoa ho kenyeletsa bohle ba nang le kobo ea bohali ho tloha mebusong ho ea ho sechaba ho ela hloko 'moko-tabo le litebello tsa RERA 'moho. Morero ona o tsamaellana le moralo oa tšebetso oa RERA", Mofumahali Baleni a rialo.

Sebokeng, Mookameli oa Mokhatlo oa Lik'hamphani tsa Phepelo ea Motlakase oa Tikoloho ea Afrika e Boroa (SAPP), Dr. Lawrence Musaba o bontšitse hore leha e le hore litho li ne li rerile hore phehlo ea motlakase tikolohong e be boemong ba linoko tse leshome lekholong (10%) holim'a e tloaelehileng, hajoale e boemong ba linoko tse 7.4% eo e leng hore e katlase ho litebello.

"Keketseho ka karolo ea leshome le metso e mehlano lekholong (15%) holim'a e teng hajoale e ka ba e molemo haholo e le e boloketsoeng nakong ea mathata. Hajoale ho na le khaello ea 2,800 MW ea motlakase tikolohong ena. Bothata bo boholo e ntse e le hore ha ho tseteloe ho lekana phehlong le phepelong ea motlakase," Dr. Musaba o ile a eketsa joalo.

Dr Musaba a supa hore ho tla ba le ho khaoha ha motlakase kahar'a tikoloho ho fihlela selemong sa 2018. Dr. Musaba o boletse hore leha ho ne ho e-na le merero e phethetsoeng ea ho fehla motlakase linaheng tse ling, hajoale, ke naha ea Angola feela e ka thusang ho fokotsa phokolo ea motlakase. Leha ho le joalo, o bontšitse hore qholotso ke hore marang-rang a motlakase a Angola ha a hokahana le a linaha tsa SADC.

Ha ho shejoa liqholotso tse tobileng tikoloho, 'moka o bontšitse hore ho na le bothata ba ho khotaletsa tšebeliso 'moho tikolohong holim'a merero ea phehlo le phepelo ea motlakase ka lebaka la mathata a fapaneng joaloka ho qothisana lehlokoa ha linaha litaba-tabelong tsa sechaba sa naha ka 'ngoe.

Ho fena bothata boo, litho tsa SADC le ba nang le seabo maemong a fapaneng, ha ba keba hlokomelise lichaba tsa habo bona ka maano le melemo ea merero e joalo linaheng tsa bona. Bothata bo bong bo ileng ba hlahisoa, ke hore tikoloho ea SADC e na le litsi tse nang le bofokoli bo boholo ba meralo ea tšebetso. Ho feta moo, phetsetsano ea melaetsa tikolohong lipakeng tsa

ba nang le seabo e bonahala e le eona pharela hobane e kenelletsa tšebeliso ea lipalo ho ena le ho etsa hore melaetsa e utloahale ho bohle.

'Mokeng ona, Mookameli oa Lekhotla la Taolo ea Motlakase le Metsi Lesotho (Lekhotla), Assoc. Prof. Ntoi Rapapa ebile molula-setulo oa lipuisano tse holim'a sehlooho se neng se bua ka tšebeliso le ho kenyeletsoa ha menyetla ea matla a tlholeho a inchafatsang (renewables), moo har'a tse ling ho ileng ha buisanoa ka tšebeliso ea matla a tlholeho linaheng tsa SADC, le tsela ea mokhoa oa ho hokahanya litsi le ho matlafatsa bahlahisi ba ikemetseng ba phehlo ea motlakase ka matla a inchafatsang (IPPs).

Ka letsatsi la boraro, RERA e ile ea tšoara Phutheho e Akaretsang ea Selemo le Selemo (AGM) moo litho li ileng tsa buisano ka tšebetso e tloaelehileng ea mokhatlo joaloka likhakanyo tsa lichelete tsa 2015, khatelopele ea Moralo oa Tšebetso oa 2013 - 2017 le lethathamo la liketsahalo tsa 2015.

Ho ipapisitsoe le likhohale tse entsoeng likopanong tsa RERA ka khoeli ea Phato 2014 tse neng li tšoaretsoe naheng ea Swaziland, phuthehong ena ea selemo le selemo ho ile ha etsoa qeto ea hore Sehlopha sa Tšebetso se sebetsanang le Litšebeliso tsa Basebelisi ba Motlakase le Phetsetsano ea Melaetsa e fetoloe ho ba komiti e katlas'a Komiti ea Khokahanyo ea Tšebeliso 'moho ea Tikoloho. Ho bile ha buuo hape ka hore Komiti ea Litaba tsa Bosebetsi le eona e se e tla ikarabella katlas'a Komiti ea Ntlafatso ea Ntlafatso ea Litho le Phetiso ea Melaetsa ea RERA.

Ho feta mona, AGM e ile ea lumellana ka hore 'moka oa RERA le AGM tsa 2015 li tla hlophisoa ke Lekhotla la Taolo ea Motla la Swaziland (SERA), ha Lekhotla la Taolo ea Matla le Metsi la Tanzania (EWURA) lona le tla tšoara liphutheho tsa likomitjana tse fapaneng.

Lekhotla le ne e emetsoe ke Mookameli oa Boto Dr. Leboli Thamae, Litho tsa Boto, Dr. 'Mampiti Matete le Mofumahali 'Maboiketlo Maliehe, Mookameli oa Lekhotla, Assoc Prof. Ntoi Rapapa le litho tsa Botsamaisi tsa Phethahatso e leng Benghali Monti Ntlopo, Paseka Khetsi, le Shao Khatala

Seabo sa sechaba le methati ea ho etsa liqeto tsa litheko tsa motlakase le metsi

Ho bohlokoa ho toboketsa molemo oa ho kenyeletsoa ha maikutlo a sechaba ho etsoeng ha liqeto tsa taolo ea litsebeletso tsa metsi le motlakase.

Khaolo ea 24(6) ea Molao oa Lekhotla la Taolo ea Motlakase Lesotho oa 2002 o hlomathisitsoeng (LEA Act), e bontša hore Lekhotla le lokela ho etsa khoelehetso ea ho nonya maikutlo a sechaba mabapi le litefiso tsa litsebeletso tsa motlakase, metsi le likhoerekhoere likoranteng le litsing tse ling tsa bophatlalatsi kahare ho naha. Sepheo sa tsebiso e joalo ke ho fa ba nang le seabo monyetla oa ho fana ka litlatsetso le maikutlo holim'a litefiso tsena.

Sethathong likopo holim'a tlhahlobo-bocha ea litheko tsa litsebeletso tsa motlakase le metsi le likhoerekhoere li hlalisoa ke lik'hamphani tse laoloang ke Lekhotla e leng K'hamphani ea Lesotho ea Motlakase (LEC) le K'hamphani ea Metsi le Likhoerekhoere (WASCO).

Ho na le mabaka a mangata ao LEC le WASCO e a hlalolang e le a qholotsang hore li hlallobe litefiso bocha. Motlakaseng, lebaka le leholo ke taba ea motlakase o rekoang ho tsoa kantle ho naha ka litjeo tse phahameng e le ho tlatsetsa motlakaseng o kahare ho naha. Mabaka a mang ke litšenyehelo tsa LEC tsa khoebo nakong ea tšebetso, litjeo tsa tšebetso, ho felloa ke matla ha boleng ba thepa le ho fumana phaello holim'a matsete a LEC.

Ka lehlakoreng la litsebeletso tsa metsi teng, taba ea matsoai le ho pomptjoa ha metsi ke e 'ngoe hape e rotelletsang hore ho be le kopo ea nyollo ea litheko ke WASCO.

Lekhotla ha le se fumane kopo ea tlhatlhobo tsa litefiso, le lokela ho tsebisa sechaba, e be le fa ba nang le kobo ea bohali nako ea ho hlalisoa maikutlo holim'a kopo e joalo. Ba nang le kobo ea bohali ba boetse ba lokela ho bontša thahasello ea bona ka mongolo e le hore ba tle ba teke litaba tsa bona ka molomo ka pele ho Komiti ea Boto ea LEWA ea Litheko le Litefiso.

Ka letsatsi la ho mameloa ha maikutlo le litlatsetso, bafani ba litsebeletso ba fuoa monyetla oa ho fana ka mabaka a tlhahiso tsa bona mabapi le litefiso ho sechaba le ho re na litefiso tsena tsa bona li ipapisitse le eng. Kamorao ho moo e-be Boto e botsa bafani ba litsebeletso lipotso tse hlokanang litlhakisetso mabapi le litsebeletso tsa bona.

E le ho netefatsa hore batho bohle ba emetsoe, bohle ba nang le seabo ba fuoa monyetla oa ho tšohla litlhahiso tsa bona mabapi le litefiso le ho botsa bafani ba litsebeletso lipotso molemong oa litlhakisetso. Bafani ba litsebeletso ba lebeletsoe ho araba tsohle tse botsoang.

Kamor'a ho batla maikutlo a sechaba, Boto ea LEWA e hlalobisisa kopo ea nyollo e ntse e etse hloko maikutlo a ba nang le kobo ea bohali, mabaka a bona le bopaki bo fanoeng ebe ho etsoa qeto ea mapomelo ea litefiso tse tlang ho sebelisoa selemo seo kaofela. Ho bohlokoa ho toboketsa hore qeto ea mapomelo, e nang le mabaka a e tšehetsang e tsebisoa bohle ba nang le kobo ea bohali ka nako e le 'ngoe.



Boto ea Lekhotla la Taolo ea Motlakase le Metsi (LEWA) nakong eo le phatlalatsang litheko tsa motlakase tsa 2014-15 ho baphatlalatsi ba litaba. Ketsahalo ena ke e 'ngoe ea tse supang boikemisetso ba Lekhotla ba ho sebetsa litaba tsa taolo ka ponaletso le sechaba.

8 Ho bohlokoa ho toboketsa molemo oa ho kenyeletsoa ha maikutlo a sechaba ho etsoeng ha liqeto tsa taolo ea litsebeletso tsa metsi le motlakase. Seabo sa sechaba se khothaletsa hore ho etsoe liqeto tsa moshoelella ka ho ela hloko le ho tsebahatsa litlhoko le lithahasello tsa ba nang le kobo ea bohali litabeng tsa metsi le motlakase. Ho kenya letsoho ha sechaba ho boetse ho khothaletsa le ho bebofatsa boithukhubetso ba ba amehileng kapa ba nang le thahasello liqetong tse joalo. Tlatsetso ea sechaba e na le tšusumetso holim'a qeto e ka fihleloang qetellong ke Lekhotla. Kahoo bohle ba nang le seabo

ba lokela ho kenya letsoho methating eohle ea taolo le ea ho etsoa ha liqeto holim'a lintlha tse ba amang ka kotloloho kapa tse sa ba ameng ka kotloloho.

Nakong e fetileng Lekhotla le ile la tsoara limmoka tse 'maloa literekeng e le hore ba nang le kobo ea bohali ba tle ba hlalise maikutlo a bona ha ho etsoa liqeto tse ka ba amang. Limmoka tse tsoareloang literekeng li boetse li thusa Lekhotla ho fumana litaba tse ling holim'a maikutlo a basebelisi ba motlakase le metsi litabeng tsa litefiso le mekhoeng e meng ea tšebetso. □

Lekhotla le labalabela phano e khahlisang ea litsebeletso

Lekhotla la Taolo ea Motlakase le Metsi (Lekhotla) le etse hloko hore ka nako tse ling litjeo tsa khokelo ea motlakase malapeng li etsoa ka tsela e se nang ponaletso ho basebelisi ba motlakase, 'me Lekhotla le ka har'a mothati oa ho kopanela tšebetso le ba ka sehloohong Lefapha la Phepelo ea Motlakase le ho fumana tharollo ea moshoelella bothateng bona.

Taba ena e phatlalalitsoe ke boemeli ba Lekhotla e le ho arabela lingongoreho tse neng li hlalositsoe likopanong tse neng li tsoaretsoe Berea, Mohale's Hoek le Butha-Buthe ka khoeli ea Mphalane, Pulungoana le Tšitoe ka selemo sa 2014. Likopano tsena tsa literekeng tse kenyeletsang thupelo le lipitso tse peli li ne li reretsoe ho beha sechaba leseling ka boikarabelo le mesebetsi ea Lekhotla.

LEWA ha e bua le ba nang le kobo ea bohali e leng

Ho bile le ipiletso ba hore Lekhotla le etse bonnete ba hore lik'hamphani tsena tse laoloang li arabela litaba tsa phano ea litsebeletso ka tsela e nang le boiphihlelo.

sechaba, basebelisi ba motlakase le metsi le Bakhethoa ba puso ea libaka metseng ea literopo, e hlalositse hore ba nang le seabo ho ESI joaloka LEC le 'Muso ba ntse ba leka ho fumana mekhoea ea ho fa lihlopha tse fapaneng tsa basebelisi ba motlakase litsebeletso tse nang le ponaletso.

"Lekhotla le lekile ho rarolla bothata ka ho etsa melaoana ea tsamaiso e tla lateloa ke LEC ha e kenya motlakase. Leha ho le joalo, LEC e ile ea ba le bothata ba ho kenya melaoana eo ea tsamaiso tšebetsong ka lebaka la seo e se boletseng e le qholotso ea lisebelisuo le lichelete. Kahoo, Lekhotla le ntse le kopana le ba nang le kobo ea bohali ho fumana tsela e nepahetseng ea ho tsoela



Lekhotla le na le thahasello ea hore litsebeletso tsa motlakase li pharalle sechabeng.

9 pele,” ho itsalo Monghali Shao Khatala, Mookameli oa Lefapha la Litaba tsa Basebelisi ba Motlakase le Metsi.

Mathata a mang a litsebeletso tsa ESI a ileng a hlalisoa ke ba nang le seabo likopanong tse tharo a ile a kenyeletsa hore LEC e lieha ho fa bakopi ba khokelo ea motlakase likhakanyo tsa ho hokela motlakase (quotation), ho khaoha khafetsa ha phephelo ea motlakase libakeng ka ho fapana, tsekisano ea tšebeliso ea mobu le ho hloma kapa ho beha thepa ea motlakase (wayleaves). Lekhotla le ile la bontša linako tseo litsebeletso tsa motlakase li lokelang ho fanoa ka tsona ho ipapisitsoe le tokomane ea Lipehelo tsa Boleng ba Litsebeletso tsa Phephelo ea Motlakase, Metsi le Likhoerekhoere (QoSSS). Tokomane eno e fumaneha marang-rang a Lekhotla ho (http://www.lewa.org.ls/Standards/Standards/QoSSS_Urban_2006.pdf).

Ho latela se hlalositsoeng kaholimo LEWAe ipilelitse ho baahi ba libaka ka ho fapana ho matlafatsa likamano tse mofuthu e le hore litsebeletso tsa phephelo ea motlakase li anele kante ho tšitiso.

Litaba tsa metsi

Ho ile hoa tšohloa mathata a litsebeletso tsa metsi le likhoerekhoere metseng ea literopo. Mabapi le litsebeletso tsa K’hamphani ea Metsi le Likhoerekhoere (WASCO), basebelisi ba metsi ba bontšitse hore litefiso tsa K’hamphani ha li na ponaleto. Mohlala, ba supile hore litefiso tsa basebelisi ba metsi tsa WASCO li holimo hape li ne li sa hlakise methati ea tharollo ea litletlebo e ka lateloang ke basebelisi ba metsi literokeng. Ka linako tse ling basebelisi ba metsi ba supile hore basebelisi ba WASCO ba ne ba sa ba sebeletse hantle.

“Ha ke utloisise hore na ke hobane’ng kamehla ke lefa litjeo tse holimo tsa metsi empa ke tšoha ke bone basebelisi ba WASCO ba tl’o bala mithara oa ka oa

metsi lapeng. Ke lumela hore bothata bona bo tla qetella bo entse hore ke koalloe metsi hobane ke sa atlehe ho lefa M700.00 le litsoala tseo WASCO e reng kea li kolota,” ho rialo ‘M’e Mathabo Litsiame, moahi oa Lithabaneng, Teyateyaneng.

Basebelisi ba litsebeletso tsa motlakase, metsi le likhoerekhoere ba ile ba tsebisoa ka litebello tseo mangolo a tumello ea tšebetso ea lik’hamphani tse laoloang ke Lekhotla (licencees) li lokelang ho ba le tsona, tse totobatsang methati e lokelang ho lateloa ea ho sebetsana le litletlebo tsa basebelisi ba motlakase le metsi, ‘me tse tlamehang ho ananeloa ke Lekhotla hore li kene tšebetsong. Ho kenngoa tšebetsong ha methati ena ho tla netefatsa hore ho be le tšireletso ea basebelisi ba litsebeletso tsa motlakase, metsi le likhoerekhoere e le hore ba se ke ba sekisetsoa.

Lekhotla le ile la boela la hlaloesa sechaba ka methati ea tharollo ea litletlebo likopanong tseo tse tharo.

Seabo sa babusi ba literoke

Likopano tse tse tharo li bile teng ka thuso ea liofisi tsa Babusi ba Literoke tseo tse tharo ho ipapisitsoe le tšebeliso ‘moho ea moralo oa tšebetso e seng e ntse e le teng pakeng tsa tsona le Lekhotla. Baemeli ba Liofisi tseo ba ile ba toboketsa ka matla hore litsebeletso tsa phano ea motlakase, metsi le likhoerekhoere li ntlafatsoe. Ho feta moo ba ile ba ipiletsa ho Lekhotla ho etsa bonnete ba hore lik’hamphani tsena tse laoloang li arabela litaba tsa phano ea litsebeletso ka tsela e nang le boiphihlelo. Baemeli ba liofisi tsa puso ea libaka bona ba ile ba koala lithupelo, ‘me ba bontša ka bokhutšoanyane hore mosebetsi oa bona o hokahane le oa LEWA lintlheng tse kang tsa ho etsa meralo ea phano ea litsebeletso le phumantšo ea litsebeletso tsa moshoelella □

Boikarabello ba Lekhotla papisong le ba LEC le WASCO

Ho latela molao oa 2002 o hlomathisitsoeng oa Lekhotla la Taolo ea Motlakase, Lesotho la Taolo ea Motlakase le Metsi Lesotho (LEWA) le na le matla a ho laola litsebeletso tsa motlakase, metsi le likhoerekhoere metseng e literopong tse fanoang ke lik’hamphani tse laoloang ke lona molemong oa bohle ba amehang. Karolong ena ho etsoa tlhaloso e khutšoanyane bakeng sa bohle ba amehang e le hore ba hlalohanye boikarabello ba LEWA papisong le ba Lik’hamphani tse fanang ka litsebeletso tsa metsi le motlakase.

Lekhotla le fane ka mangolo a tumello (lilakesense) ho K’hamphani ea Motlakase Lesotho (LEC), K’hamphani ea Metsi ea Likhoerekhoere (WASCO) le Setsi sa Phehlo ea Motlakase ‘Muela sa Morero oa Metsi a Lihlaba (LHDA). Ha e le Lefapha la Matla lona (Department of Energy) le filoe lakesense e nang le lipehelo tse bobebe e le ho phethisa tšebetso ea phephelo ea motlakase libakeng tseo e seng tsa literopo.

A. Mosebetsi oa Molaoli – LEWA

Lekhotla har’a tse ling le etsa mosebetsi e latelang:

1) Ho beha litheko tsa litsebeletso tsa motlakase, metsi le likhoerekhoere metseng e literopong.

Boikarabelong ba lona ba bolaoli, Lekhotla le sireletsa litaba-tabelo tsa ba amehang mabapi le taolo ea litheko tsa litsebeletso. Molemong oa ponaleto, molao o hloka hore Lekhotla le etse phatlalatso ea likopo tsa nyollo ea litheko e le hore bohle ba amehang ba fane

Karolong ena ho etsoa tlhaloso e khutšoanyane bakeng sa bohle ba amehang e le hore ba hlalohanye boikarabello ba LEWA.

ka maikutlo a bona mabapi le litheko tsa litsebeletso tse fanoang ke lik’hamphani tse ikarabellang. Ha Lekhotla le se le hlahlobile kopo e joalo, maikutlo a ngotsoeng a sechaba, bopaki ba lipuisano ho tsoa ho bohle ba amehang, ho boetse ho e-na le mabaka le lintlha tse feletseng, Lekhotla le etsa qeto holim’a litefiso.

2) Ho fana ka Lipehelo tsa Boleng ba Litsebeletso tsa Phephelo ea Motlakase, Metsi le Likhoerekhoere (QoSSS) literopong le ho beha leihlo hore lik’hamphani tse fanang ka litsebeletso li ipapisitse le QoSSS le melaoana e meng ea taolo ea tsona.

Ha le etsa lipehelo (standards), Lekhotla le beha maemo a tšebetso ao lik’hamphani tse laoloang ke lona li lokelang ho ikamahanya le `ona. Hona ho bolela hore lik’hamphani li lokela ho fana ka litsebeletso li ipapisitse le maemo ao li a behetsoeng. Ho etsoa hona ha lipehelo ho thusa LEWA ho beha tšebetso ea lik’hamphani leihlo hore efela li ikamahanya le mekolokotoane e behiloeng ea taolo. Litsi tse amehang ha li a tlatsetsa tšebetso ena.

3) Ho rarolla liphapang le mathata lipakeng tsa lik’hamphani le basebelisi ba litsebeletso tsa lik’hamphani tseo.

Litletlebo tsohle tse fetiselitsoeng ofising ea LEWA li lokela hore li be li na le `moko, ‘me li be le lintlha tse latelang:

- Moji o lokela e be o ile a tlaleha litletlebo ea hae ka



Ke boikarabello ba Lekhotla ho elelloisoa batho ka kakaretso ka se etsoang ke litsi tse fapaneng tsa sechaba taolong le phanong tsa litsebeletso

ho ngolla LEC kapa WASCO hore e tle e rarolloe mothating oo.

- Ke hore tletlebo e joalo e be e sa ka ea sebetsoa kapa hona ho rarolloa ka nepahalo ke WASCO kapa LEC ho latela molli; hape
- Tletlebo ea molli e lokela hore e be e le holim'a litšebeliso tsa phano ea motlakase, metsi le likhoerekhoere metseng ea literopo.

B. Mesebetsi ea lik'hamphani tse laoloang

Dr. Thamae ke Molula-Setulo oa Boto ea LEWA e mocha

Pele a khetheloa bolula-setulo ba Boto, Dr. Thamae ebile e mong oa litho tsa Boto moo e neng e le setho sa komiti ea Litefiso, Litheko le Bahlahlobi ba Libuka tsa Lichelete.

Dr. Leboli Thamae ke Molula-setulo e mocha oa boto ea LEWA ho tloha ka khoeli ea Mphalane 2014. Dr. Thamae o hlalame Prof. Francina Moloi eo e neng e le Molula-setulo oa Boto ea LEWA ho tloha ka Loetse 2010.

Pele a khetheloa bolula-setulo ba Boto, Dr. Thamae ebile e mong oa litho tsa Boto moo e neng e le setho sa komiti ea Litefiso, Litheko le Bahlahlobi ba Libuka tsa Lichelete.

Dr. Thamae ke le Molula-Setulo oa boraro oa Boto ea LEWA ho tloha ha Lekhotla le qala tšebetso ea lona ka 2004. Hona ho etsahala ka nako eo Lekhotla le qetang ho kenya Moralo oa Tšebetso oa selemo sa 2014/15-2018/19 o nang le sepheo se nang le lintlha tsa mantlha tse 'maloa tsa tšebetso.

Lintlha tseo li kenyeletsa ho lekola le ho batlana le mekhoe e bolokehileng ea ho tsitsisa phepelo ea motlakase, metsi le likhoerekhoere metseng ea literopo, ho khothaletsa ho ntlafatsoa ka litsebo le likhokahanyo ha bohle ba amehang phanong ea litšebeliso, matlafatso ho baji le tšireletso, ho ntlafatso le ho kenya

Lefapheng la Phepelo ea Motlakase (ESI), LHDA ka setsi sa 'Muela e fehla 72 MW ea motlakase e fepelang naha. LEC e tlameha ho fepela naha ka motlakase. Ka lehlakoreng le leng LEC e tsamaisa, esita le ho fepela naha ka motlakase ka marang-rang a eona. DoE e hokahanya basebelisi ba motlakase metseng e khethiloeng ke 'muso. WASCO e lebelletsoe ho fepela baji ka metsi a hloekileng e be e fane ka litšebeliso tsa ho hula likhoerekhoere ho baahi ba literopo tsa Lesotho.



Molula-Setulo, Dr. Leboli Thamae.

tšebetsong meralo ea tšebetso ea taolo le ho etsa LEWA e be Lekhotla le sebetsang ka tsela e nang le bokamoso.

Boto ea Lekhotla e fana ka moralo oa tšebetso o hlakileng e le ho fihlella chebello-pele le sepheo sa Lekhotla.

Basebetsi ba Lekhotla tlas'a botataisi ba Mookameli (Chief Executive) ba phethahatsa moralo ona. Tebello ke hore katlas'a tsamaiso ea Dr Thamae, Lekhotla le tla sebetsa hantle e le ho fihlella litebello tsa lona joalokaha li hlaha tlas'a Moralo oa Tšebetso oa 2014/15-2018/19.

Ho sa le joalo Monghali Thabo Khasipe o khethiloe e le setho se secha sa Boto, 'me sena se etsa hore Boto ea LEWA e be le litho tse supileng joalokaha molao o hlomathisitsoeng o tlama hore ho be joalo.



Molula-Setulo oa mehleng, Professor Francina Moloi.

Basebeletsi ba LEWA ba ananela bosebeletsi bo fanoeng ke Prof. Moloi eo e neng e le Molula-Setulo oa Lekhotla 'me ba mo lakaletsa katleho le mahlohonolo mererong ea hae ea kamoso.

Basebeletsi ba LEWA ba amohela litho tse peli tsa Boto ebile ba li lakaletsa katleho mesebetsing ea tsona. Ka tsela e tsoanang basebeletsi ba LEWA ba ananela bosebeletsi bo fanoeng ke Prof. Moloi eo e neng e le Molula-Setulo oa Lekhotla 'me ba mo lakaletsa katleho le mahlohonolo mererong ea hae ea kamoso.

Ho latela molao oa LEWA oa 2002 o hlomathisitsoeng, Letona la Matla, Bolepi le Metsi ke lona le khethang litho tsa Boto ea LEWA □

12



**Motlakase
o kotsi ha
o sebelisoa
hampe!**

Ke 'nete hore motlakase o bohlokoa haholo maphelong a rona ka kakaretso. Ho tloha nakong eo re tsohang, ho fihlela ha re robala, re sebelisa motlakase. Ka lebaka lena, ke ntho e sa makatseng hore re o sebelisa ntle le ho se nahane mathata a ka bakoang ke ho o sebelisa hampe, 'me oa hlahisa batho kotsi kapa hona ho ba bolaea.



Lekhotla la Taolo ea Motlakase le Metsi Lesotho
le na le bokirabello ba ho hlokomelisa sechaba ka tšebeliso e mope ea motlakase e ka bakang likotsi.

‘Ntle le ho khibe-khibela, Lekhotla le fihletse sepheo sa lona’...

...ho boletsoe ke Mookameli oa LEWA, Prof. Ntoi Rapapa

Boitlahlobo ba tšebetso ea Lekhotla la Taolo ea Motlakase le Metsi (LEWA) ka kakaretso ho shebiloe tema e khathiloeng ho fihlella merero ea lona ea 2014, bo bontša hore leha ho bile le liqholotso, Lekhotla le atlehile ho fihlella bohola ba litaba-tabelo tsa lona.

Sena se boletsoe ke Mookameli oa LEWA, Prof. Ntoi Rapapa moketjaneng o neng o koala selemo bakeng sa phomolo ea Kereseme le Selemo se secha o neng o tšoaretsoe basebetsi ba Lekhotla ‘Melesi Lodge.

“Kopano ena e re qholotsa hore itlahlabe ka hore re hetle morao, re ichebe hajoale esita le ho sheba pele ho tse tlang li re tobile. Leha re bile le liqholotso tse ‘maloa, ke motlotlo ho bontša hore ka kakaretso ho bile le boipabolo mosebetsing. Ka nako ena eo re eang

phomolong ea libeke tse peli, re tlameha ho nahana hore na re tla etsa joang ho ntlafatsa litšebeliso selemong sa 2015 molemong oa rona le bohle ba nang le kobo ea bohali,” o ile a li beha joalo Assoc. Prof. Rapapa.

O hopolitse basebetsi hore malapa a tsitsitseng ke mokokotlo oa katleho mosebetsing le metseng. A tsoelapele ho khothaletsa basebetsi ho qeta nako e telele le ba malapa a bona kaha sena se tla etsa hore ba khutle ba le morolo selemong sa 2015.

Mokete ona o boetse oa matlafatsa moea oa ho sebetsa ‘moho selemo ho pota joalokaha Lekhotla le ne le rerile joalo. A mang a matšoa a taba ena e ne e le ho buisana ha basebetsi ka bolokolohi bohle bo teng, le moea oa thabo o neng o rena e le bopaki ba ho natefelo moketeng oo □



Basebetsi ba Lekhotla ba ile ba iketsa khokanyana phiri ho thaba ‘moho nakong ea mokete oa Keresemese.



U tšoenyehile ka Boleng ba Metsi?

Hape le...

- Likhakanyo tsa khokelo tsa metsi • Khokelo tsa metsi
- Khaolo ea phephelo ea metsi • Khokelo
- Khaolo ea phephelo e bakiloeng ke bothata ba marang-rang a WASCO?

Lekhotla la Taolo ea Motlakase le Metsi (LEWA) le hlakisitse litokomane tse ‘maloa tseo ka tsona taolo ea metsi le likhoerekhoere e tlang ho phethahatsoa ka tsona. Ka hara tse ling, Lekhotla le hlakisitse tokomane ea Lipehelo tsa Boleng ba Litšebeliso le Phephelo tsa Metsi le Likhoerekhoere (Urban Water Quality of Service and Supply Standards - QOSSS). Tokomane ena molemo oa eona ke hore K’hamphani ea Metsi le Likhoerekhoere (WASCO) e fane ka litšebeliso e ipapisitse le lipehelo tse behiloeng tse kahar’a eona. WASCO e lebelletsoe hore ebe e qalile ho kenya lipehelo tsena tšebetsong ho tloha ka Mphalane 2013.

Molemong oa litšebeliso
tse phethahetseng holim’a metsi
le likhoerekhoere literopong.

Ho fumana tlhakisetso e fellelseng, ikopanye le rona: 7th Floor, Moposo House, Kingsway, Maseru, Lesotho

Tel: +266 22 312479 • Fax: +266 22 315094 • Email: secretary@lewa.org.ls



Uena u tseba ha kae ka LEWA

Ka Lefapha la Litaba tsa Basebelisi ba Metsi le Motlakase, Lekhotla la Taolo ea Metsi le Motlakase (LEWA) le ikemiselitse ho hlaloesa sechaba ka mosebetsi oa lona holim'a taolo ea litaba tsa metsi, likhoerekhoere le motlakase. E le ho fihlela katleho boikemisetsong bona, Lekhotla le sebelisa mekha e mengata ea ho buisana le sechaba. Mehlala ke maselinyana, likoranta, liea-le-moea, le telefishini.

Bakeng sa lithalosoetso tse pharaletseng, u ka re fapohela Lesotho Electricity & Water Authority:

7 Floor, Moposo House, Kingsway, Maseru, Lesotho

Tel: +266 22 312479 Fax: +266 22 315094 Email: secretary@lewa.org.ls Website: www.lewa.org.ls